

聞却疾

天花色紅而秀上有尺餘懸絲秋未遍開幽

麗可愛音

玄帝昇其敢之巖谷迄今仙裔傳之無窮  
雲竹地之靈瑞凝之於竹紫瑩黑紋見者奇

之茂林之中間見一二

涉難樹其葉不凋其本本高實如大粟生深

澗大山之陰隱然有映覆廣寒之象

芳馥樹葉青而秀木大而高根株皆自然藤

蘿交表之勢與重者無比武當有二大頂

與五龍接待廣澗瀆

石燈心生武當山地中色蒼而直如腐石之

形浸以膏油光明洞煥

金星石 銀星石

玄帝上昇地皆變此滿山皆然能瘳小兒

驚癩之疾諸方俱用但性寒耳

山肴野歎松菌苟脯橙湯木煎茗茶露酒粟

飯橡糕自有得慶至如紙食糝穰足以禦

寒松燈樺燭足以繼晷詩云山田粟米飯

野菜淡黃蕘箇中滋味別只許自家知

玄帝養士之福如此儻非識破浮華焉能  
笑傲物外敬錄此語示諸同志

武當福地總真集卷中

正一天師清微弟子 洪百堅 製作  
道教學術資訊網站

武當福地總真集卷下

天封玄帝聖號 出仙傳

不三

聖號元帥鎮天玄武大將軍三元都總管九

天遊奕使左天罡北極右垣三界大都督

神仙鬼神公事判玄都右勝府事領元和

遷校府事紫皇天一天君玉虛師相玄天

上帝

宋封聖號

北極鎮天具武佑聖助順靈應福德仁濟正

烈協運輔化真君 本名玄武帝

靜樂國傳記龍變梵度天之下靈寶大法諸

大祕文云龍變梵度天北方之天四種民

天之一在無色界之上其色赤太虛之景

靈寶之宮下應西方婁宿又武當圖記五

龍頂一峰上應龍變梵度天北方五炁龍

君居之今均州之南三十里有村名曰樂

都傳云此古淨樂國村之東山下古陵數

塚者舊相傳云靜樂國王之塋又風土記

均州上古之時即有康之國謂人民朴野

安靜樂善雖曰康鹿猶可安居又仙傳稱

黃帝降生於有熊之國赤帝降生於厲山氏之國玄帝降生於淨樂之國蓋為玄帝神功聖德萬物未嘗潤澤發生不欲以有虞之國稱之而取其人民安靜樂善易之曰靜樂可知矣切觀均州風土太和之水灣環百曲神仙窟宅考之古史仙傳靜樂國即均州無疑矣

仙宵 太玄經云天一生水地二生火

玄帝主宰天一之神故呪曰水位之精宮曰天一之宮仙傳云天一之精是為玄帝

天一之氣是為水星天一之神是為五靈老君天一之象應兆虛危是為玄武其名則一其形則二見相玄龜亦蛇其精氣所變曰雨露曰江湖河海應感變化物之能飛能聲者皆天一之所化也水火昇降龜蛇合形品物是生玄帝即其主宰天一之帝也

玄帝傳記按混洞赤文元物恍惚大道有冥一氣凝三寶於無色無欲之先五劫混洪造於乍適乍返之際太由是極文自此彰

重濁輕清分判上下皇天后土主鎮範圍天一生水於坎宮神化肇形於坤壘大木金土安鎮方維赤青白黃各司帝任星辰日月演玄綱而原象育形高厚神祇體好生而隨時設教魏魏蕩蕩赫赫煌煌妙矣

難言淵乎莫測壯極佑聖玄武天一天君玄天上帝天一之帝水位之精太極隱之云天一之精是為

玄帝分方於坎斡旋萬有天一之氣是為水星輔佐大道周運化育天一之神是為

五靈老君佐天拱極天一之象應兆虛危司經緯于址是為玄武其名則一其形為二是有玄龜赤蛇之象其精氣所變曰雨露曰江湖河海應感變化物之能飛能聲皆天一之所化也龜蛇合形天地定位惟

玄帝天一之帝故能攝制地二生火分方于離是為赤帝像應朱雀天三生木分方于東是為青帝像應青龍地四生金分方于西是為白帝像應白虎惟天五之數黃帝中主萬神無越茲不具載斷鷲已後五

帝輔相大道玄帝有潤澤發生至柔上善滌穢蕩氛平靜之德上及重霄下及飛潛動植莫不資焉玄元始炁歷劫下降出書度人而

上帝乃命玄帝下遊人間上三皇時降為太初真人中三皇時降為太始真人下三皇時降為太素真人當是之時結繩治政不可復考至開皇初劫雜惡善消正道當行下界南洲宜更茹毛飲血穴居野處之化

上帝乃命五帝繼降人間化育黎庶惟青帝首出降于坤輿之中名太皞號伏羲氏建立邦國觀察法始有星緯之文正君臣父子夫婦之分龍圖河出龜書洛呈畫卦造書布德行惠赤帝降生於厲山氏國今隨州是是為炎帝號神農氏樹植百穀民得粒食然火德令熾致有諸侯互侵蚩尤為虐之患數使然也蓋赤帝火玄帝水水火有不可相離之兆繼而降玄帝降生於淨樂之國名招搖童无號靈潛氏黃帝降

019 A 0 0 - 1

生於有熊之國史皇南諡曰河名軒轅號黃帝白帝亦降生於黃帝之宮名少皞號金天氏俱主持正統撫育兆民手亂著功復歸本位玄帝稟天一之精惟務靜應不樂南面志復本報

上帝乃以天一餘氣下降金天氏之宮名顯頊號高陽氏代玄帝握符御衆謹按玄帝降生淨樂國之日即神農氏之末年歲在闕逢敦牂甲子姑洗月三哉生明初臘馭天中軒符天一之陽精托胎神化於翼軫婁三宿之次龍變梵度天之下靜樂國善勝夫人之腹孕秀一十四月產母左脇而生當生之時祥雲異香瑞應難述生而神靈及七歲天文書契一覽默會潛心至道願事

上帝普福兆民欲尋幽谷內鍊元真遂感無極紫元君授之上道元君指太和山而告之曰此山自乾元起脉盤旋五萬里水出震宮土應翼軫二宿顯定極風太安皇崖二天汝可居之當契太和飛昇復位上

輔大道與天地日月齊并告畢昇雲而去十五辭父母父王不能抑志遂入是山潛虛玄一默會萬真身長九尺面如滿月龍眉鳳目紺髮美髯頰如水清披松蘿之服散髮跣足凝真養性四十二年成無上道

是時軒轅黃帝御世治民歲在庚寅九月九日凌晨四氣朗清鸞鶴天花相間飛舞林巒震響自作步虛仙樂之音地皆變金玉之色

玄帝拱手立於臺上須臾群仙騎從車輿旌節降於臺畔非凡見聞五真捧太玄玉冊前進曰奉

帝命召子上昇玄帝祇拜其詞曰上詔學仙聖童靜樂國子姓名以子玄元之化天一之尊功滿道備昇舉金闕可拜太玄元

帥判元和遷校府公事九德偃月金晨玉冠瓊華玉簪碧瑤寶圭紫綃飛雲金霞之帔丹裳羽縹絳絲之裾七寶鍊衣元光朱履寶印龍劍羽蓋瓊輪九光九節十絕靈幡八鸞九鳳天丁玉女億乘萬騎上朝

帝廷詔至奉行

玄帝拜帝命五真前進曰吾等奉命為子啓途一真曰予即子之別體五靈玄老黑節靈幡子不統王位志在還初謂可嘉高汝塵世父母已證真仙矣于時五龍龍君

披之上昇至紫霄峰之上解松蘿之服衣所賜冠帔飛空步虛於大頂之上乘丹輦綠輦五龍掖之飛昇霄漢躬朝上帝領職闕下後改太和之名曰武當山至開皇終劫下界生靈承平之盛驕奢

矯侮去實務華劫數欲更暴君汗吏魔鬼妖孽雜處陰陽之界商紂主世殘害酷虐六天魔衆各現形跡妖祥迭起人鬼不分盤結惡毒傷害黎庶時元始上帝說法於八景天宮上元之殿累

毒血光穢雜之氣上衝天門妙行真人叩請威光親行收除上帝宣昊天帝尊正天曆數乃勅天一之神降生西土姬姓之國名發為周武王使平治天下惟

使平治天下惟

玄帝天一之精丁甲風雨水火之神俱隸  
主治能蕩除氛穢右侍玉童持符往召  
玄帝被旨上朝天顏恭頌

帝命部坎離真相蒼龜巨蛇丁甲五雷神  
兵三十萬神將巨虬師子毒龍猛獸齊到  
下方恭行天討徇師普眾而說太陰化生  
水位之精虛危上應龜蛇合形之呪七日  
之中天下妖魔一時收斂計奏定錄鎖于  
北鄭復詣清都上朝金闕  
上帝撫勞乃命

昊天進封仙品宣告金闕侍經司玄學士  
太丹真人於玉華院裁撰玉冊其冊曰惟  
卿混黃一氣之瑞道備九陽之尊校遷人  
民毫分無失茲以劫數交會邪正混同感  
生六天魔王傷害九地黎庶儻非真力何  
得清寧德重功高難盡褒美容當歸根復  
位返本還元若不微稱焉能顯德金書錫  
降宜勿謙辭可進拜  
鎮天玄武大將軍三元都總管九天遊奕  
使左天罡北極右垣三界大都督神仙鬼

神公事判玄都右勝府事紫皇天一天君  
依前太玄元帥領元和遷校府事冊到奉  
行

上帝命玄帝可相復元初披髮跣足路躡  
龜蛇建卓纛玄旗躬披鎧甲永鎮坎位凡  
遇甲子庚申每月三七日下降人間察人  
善惡修學功過善福生靈操扶社稷  
玄帝奉詔後千變萬化為教主濟度人世  
無量無邊洞天福地靈顯感應簡冊難窮  
潤澤溥博智德恢洪無一時不念衆生無  
一刻不憐下土大慈普救無上法王也昔

宋嘉祐二年天中節三界萬真上朝  
元始上帝會三寶宸尊 昊天上帝出萬  
天素威功過玉曆勅金闕侍中司馬大神  
司命可轉真君司錄定名真君司功採訪  
真君司過保命真君考校玄功五老十一  
曜北斗二十八宿自太古至今經緯陰陽  
功齊天尊之位三官四聖太一開化佐天  
安地功亞天帝之位於是勅頒金闕三省  
推考聖功果與諸天帝君功德並隆將三

官四聖並拜帝真之號於天臘之日宣命  
三官四聖同赴

三天闕下館于玉閣分命金闕左侍翰林  
清玄學士司文真君金闕右侍翰林寶章  
學士司經真君撰制玉冊至上元日進封  
三官四聖帝號冊以玉板刻之金書守悉  
龍章鳳篆盛以雲錦寶囊護以瓊玉之匣  
金龍之鎖而玄帝玉冊曰勅赫赫至真皇  
皇大道太景開判玄元化生萬天樞機三  
界尊仰其休隆廣宜有褒崇惟

太玄元帥鎮天玄武大將軍三元都總管  
九天遊奕使左天罡北極右垣三界大都  
督神仙鬼神公事判玄都右勝府事領元  
和遷校府事紫皇天一天君玄帝靈通大  
妙道備靈明上開混化之玄下統虛危之  
秀撫成地紀保育天元持造化於四時推  
網維於八節功高五十萬劫德並三十二  
天洞香飛芒幽微焯燁按導簡錄當亞帝  
真不有微崇何以明德謹遣金真紫陽大  
夫金闕侍中素靈殿大學士主管三天門



下真日儲靈典奏事含光上德仙君軒轅  
執本齋捧玉册可特授

玉虛師相玄天上帝領九天採訪使餘當  
上輔大道劫劫長存下佑兆民綿綿永祉  
龍文昭降宜勿遜辭册至奉行於是

玄帝衆真受帝號於七寶瓊臺之上

昊天至尊親行典儀與凡世帝王拜大將  
開國承家之儀頗同上錫

玄帝瓊旌寶節九龍玉輅其冠通天十二  
梳其服玄袞上施十二章圭以玄玉履以

紅舄子今群真朝謁四聖為都班之首所  
都則曰天一真慶宮在紫微之上太素秀

樂太虛無上二天之間宮殿巍峨皆自然  
妙氣所結琳琅玉樹靈風自鳴皆合宮商  
之韻紅光紫雲常覆其上此處即玉虛之

境無色之界也玄帝拜帝號之後

上帝追贈崇封玄帝

聖父曰靜樂天君明真大帝聖母曰善勝  
太后瓊真上仙下陰天關曰太玄火精合  
陰將軍亦靈尊神地軸曰太玄水精育陽

將軍黑靈尊神並居天一真慶宮因茲三  
界仰稱曰

玄帝是編皆前後列真授付得道之士人  
世故得觀神聖功跡亦宿生之慶幸也

大都昭應宮瑞應

大元混一天下定都於燕至元七年十二月

十九日西郊高梁河金水中有蛇長尺餘

金彩青章明目復有神龜金碧交錯迴旋

泛泳時太府監玉牒尺不花因觀以事具

聞勅建宮立碑奉

玄帝聖容賜額曰昭應宮令女官道士嚴

奉住持以彰神應之靈

宋真宗皇帝加上真武將軍聖號御筆手詔

勅中書門下朕伏以丕顯聰明聿求字佑

旌寶珠號率循舊章恭惟

真武之靈茂著陰方之位妙功不測沖用

潛通尹京邑之上腹有龜蛇之見象先升

地寶慈湧神泉自然清冷飲之甘美資中

國之利澤秦民疾以蠲除倍慶濟時虔思

報德就其勝壤建以珍祠既修奉於

威容合登隆於稱讚爰稽靈寶水耀鴻禎  
真武將軍宜加號曰

鎮天真武靈應佑聖真君當體寅恭咸從  
布告故茲詔示想宜知悉

天禧二年七月七日

宋嘉定二年十一月十四日崇封誥詞

勅仰止層霄魏乎北極瞻百神之環衛有

玄武之尊嚴顧像設之已崇而號名之未

備聲稱緝典以介養聲

北極佑聖助順真武靈應真君天之貴神

國之明祀威靈在上常如對於衣冠光景

動人逐莫達於懸懸赫然祥異著于見聞

在天禧時瑞表醴泉之觀若熙寧日事傳

大順之城祖宗相繼禮文有加祠宮迺朔

於阜陵扁勝爰新於佑聖肆朕尤嚴於祭

報而神每監於禱祈戴惟彤嚮之乎曾靡

窈冥之間福詒沖眇將垂萬世之子孫德

及高深溥洽四方之黎庶誕揚盛美庸侈

徽稱金闕玉京密增於神英雲車風馬永

鎮於人寰尚冀宴娛適觀為饗可特封

北極佑聖助順真武靈應福德真君奉勅  
如右牒到奉行

宋寶祐五年二月宗封詔詞

勅北極惟尊文武先謂宮崇南面雖主百  
神必嚴寅奉既隆受護持之既宜顯嘉旌  
貴之儀申衍祭章用昭敬事

北極佑聖助順真武靈應福德衍慶真君  
道周六合威攝萬靈鍾元黃一氣之真陰  
功有賴握坎離二精之妙神化無邊以茲  
蕩邪而辟功莫匪救民而護國惟我朝之  
累聖殫至敬之一心在真朝仁廟則表靈  
應而彰感通在孝皇寧皇則奉

佑聖而崇福德迨于眇冲固當增衍慶之  
封嘉爾聰明亦既述均陽之讚躬饗冥冥  
而默應威靈赫赫以旁昭無顧不成錫庶  
民之福祉何幽弗察清四海之妖氛凡同  
普率之間均在包含之內惟仁則所濟之  
博惟正則丕烈之洪強贊上真難明至德  
尚宏道蔭永庇人寰可特封  
北極佑聖助順真武福德衍慶仁濟正烈

真君奉勅如右牒到奉行

宋仁宗讚入內堂實應開天關地軸封號冊

寶

萬物之祖 盛德可委 精貫玄天 靈光有輝  
興益之宗 保合大同 香火瞻敬 五福攸從

天關火之精贈 同德佐理至誠重感慈明

普濟陽神武聖右正侍雲騎護國保靜輔

蕭守玄太一大將軍 真相赤地變相青面

三日金甲兜鍪

地軸水之精贈 同德佐理至應大道顯明

武濟陰盛翊聖左正侍雲騎護國保寧輔

蕭玄初太一大將軍真相玄龜變相黑體

金甲兜鍪

右封贈如前嘉祐二年二月旦日門下奉

命

錄善降日

正月 初七日 二月初八日 三月初九日  
四月初四日 五月初五日 六月初七日  
七月初七日 八月初十三日 九月初九日  
十月二十一日 十一月十七日 十二月二十日

三元日 甲子日 庚申日

供獻儀物

玄帝天之大聖世之福神不樂華飾惟務清

淨

所宜 清油 淨水 燈燭 時果淨茶

棗湯 黃白花 精潔菜盃 如此獲大

吉祥

所忌 石榴 李子 荷花 紅艷花

蓮藕

辛穢鷄犬孕婦不潔之物雖福神洪慈則

侍衛神靈立彰顯報慎之

玄帝隱諱 乞 仲芳 詰 賊

四天天帝

龍變梵度天帝 內名栴靈妙光在無色界

之上其色赤又曰上妙天其宮曰靈寶宮

下應靜樂國

太安皇崖天帝 內名暉真阿魂在色界其

色白又曰極樂天其宮曰開明宮

顯定極風天帝 內名回翹威在色界其色

黃又曰廣樂天其宮曰太赤宮二天下應

武當山

豐乾大天帝 按宋侍中荆國公宋奉旨

所編

真武啓聖記第九章稱真武初學業過帝賜以黑馳虬角斷魔椎劍內名未究其詳

虛宿天卿星君危宿天錢星君

二星皆天一之象龜蛇水火之形玄帝之所統理

無極上道紫元君 內名未究其詳按仙傳

傳道付玄帝示武當山之根源今尊曰聖

師

九天掌籍上仙元皇帝君姓張名亞屬三大

神之一掌桂祿藉凡食祿為官為儒者皆

隸之為水府計度轉運相輔大道佐玄帝

濟物餘見仙傳

上清天機都承旨神應元惠真君姓董名素

皇 天至真莫究其旨輔相玄帝開教濟

物位太清西王左上卿

上清天機都承旨飛霞靈光真人中黃先生

太元真人東嶽上卿司命真君大茅君也成陽人名盈字

按中

定錄右禁郎司命真君中茅君也名周字秀偉

三官保命真君小茅君也名東字思和

三茅君金闕宰輔東嶽司命今句曲福地

三茅山即昇真之地茅山仙傳餘見後曹觀妙傳

中天欵火律令大神雷霆主帥天君

即黃帝相風后將軍破蚩尤封河南將軍

因以所封鄧為姓後隱武當壘宇峰有神

跡尚存見雷書

武當山感應五炁龍君即天一之化龍變梵

度天餘炁下鎮武當掖

玄帝上昇訪姚太守降雨于唐授陳希夷

睡法於宋雨陽祈叩其感應不可枚舉武

當五龍頂即其寓處

武當山五百靈官洞天福地

上帝游年之所各設靈官五百負主持守

衛修進之士功業成就皆隸係舉察善罰

惡之司

武當山巡山黑虎元帥灶方天一之所化護

教鎮山之神神通感靈不可具述凡骨相

未應學仙之人或現真相或發夢寐悉皆

逐去夜則巡行廊廡衛護福庭有法行之

於世

武當山忠智威烈王

唐均州太守姚簡也事見後傳

上帝司真佐命武當山真君

武當乃中嶽上帝司真洞天佐命位號真

君此太真道與錄

武當山福地仙官宮庭通天大聖里城真官

武當大頂廣瀾龍王三位即本山仙官係國封

古今明達

國經武當神仙窟宅自黃老設教神仙至

人棲之者眾又曰學道者常有百數心有

懈替則為百獸所逐夫養生之人多隱其

名字藏其時日恨山不深林不密惟恐關

名落人耳中是山證道昇真者何可勝計

去古頗遠劫火屢更多失其名今考之傳

記詢諸前輩間得一二錄之于此以備山

中勝槩云

關令尹真人周康王之大夫姓尹名喜號文



始先生嘗周之末大道將隱預占紫氣西  
邁有遁者過之出爲函谷關今未幾太上  
度關喜執弟子禮迎拜授之道德二經約  
後會蜀之青羊肆托疾不仕隱居谷內後  
入蜀歸棲于武當三天門石壁之下石門

石室喜之所居古有銅牀玉案今無之矣  
以其所居名曰尹喜巖澗曰牛漕澗青羊  
澗皆太上神化訪喜之地出與地紀勝

神仙尹軌神仙傳尹軌字公度太原人文始  
先生之弟子也博極群書晚乃學道號山  
世遠常起居林麓服黃精年百餘歲言天  
下安危盛衰未嘗不驗入太和山去領杜  
陽宮太和真人今爲紫虛陽光道德錄真  
師出真誥

神仙戴孟郡國志姓戴名之生漢將軍武帝  
遣入北山採藥棄官學道號孟盛子受法  
於清靈裴真人得玉珮金鑑之書石精金  
光之符周游名山日七百里後白日上升  
落帽於武當山峰之上迄今呼曰落帽峰  
故陳希夷有詩云我愛武當好將軍曾得

道昇舉入雲霄高峯名落帽出真誥及安公類集

神仙馬明生神仙傳姓馬字君賢號明生得  
太陽神丹之祕丹成服半劑周游人間架  
屋從徒與俗無異不過三年夫婦輒易其  
處今五龍觀自然庵即其地也

神仙陰長生雍州記長生漢光武陰皇后之  
族鄧人馬明生之弟子也得師太陽神丹  
之訣同隱武當丹成馭氣飛行周遊六合  
後至忠州仙都白日上昇

神仙燕濟道學傳名濟字仲微漢明帝時人  
少好道術棄官不仕後居武當寢息無度  
或困積石倚大木雖歷四時衣服不變居  
常散髮亦或練巾飛步雲煙人莫之近  
神仙劉虬隱逸傳劉虬字靈預天資穎悟博  
究典墳宋泰始中爲晉王記室解官辟敕  
入武當山仙去所居石室曰劉爽巖今隱  
士巖是也

神仙謝允真誥稽神樞云允字道通歷陽人  
少有英毅歷仕羅邑宰博覽群書道學尤  
精政事廉能有遁世脫塵之志晉太康中

表辭官入道詔許之遂西上武當至襄陽

見一道士語之曰吾師戴先生孟盛子非  
世間人諭我曰若有西上欲見我者可與  
俱來得無君子因以俱往見之至山雲橫  
遠岫依約松陰忽覩先生坐於石上神彩  
洞徹按以鍊神沖虛之道俄失公所於是  
結茅於石室不數年得沖寂之妙能飛行  
絕壁自號其名曰謝羅山蓋謝脫羅寧之  
寧也後仙去莫知所之出真誥及水經

姚太守傳記名簡字易夫隋人也佐唐太宗  
出爲武當節度貞觀中天下大旱飛蝗徧  
起勅禱名山俱未感應姚君被命詣武當  
肅醮有引儒士風貌殊異奇之從容語簡  
曰予等俱非凡士五龍君也準  
帝命守護此山爲子正直祈禱精嚴故來  
謁爾子已奏允帝命公宜速歸三登可慶  
矣頃之雲氣地湧失君所在雷電霖雨徧  
布天下草木稼俱各榮茂具茲靈績聞  
之朝廷即蒙恩錫解印之後挈家隱居武  
當志慕虛玄成真證道



玄帝命為本州守土鎮山之神宋初却蝗  
救旱靈顯昭著進封忠智感烈宣勅建祠  
於今紫霄宮之東

陳希夷言行現巖名搏字國南亳州人也少  
負逸材有濟物利人之志五季之世汴梁

見宋太祖而異之曰此真命也笑墜白驢  
遂有高舉雲煙之興入武當山隱居誦易

於五龍觀側感五炁龍君授之睡法聲譽  
遠著謁者頗眾尋遷誦經臺研究畫前之  
妙再遷於白雲巖五代之末四方鼎沸移

居華頂傳曰五龍飛空送之宋初累召不  
起後赴闕乞歸詔許之餘見本傳

丞相張士遜究退傳名士遜均州人也初居

光化少孤貧讀書於武當山有道士見而  
異之曰子有道氣可隨我學仙公不欲宋

太宗雍熙中登甲科身游鳳池為皇友位  
宰相

神仙房長鬚武當傳房長鬚不知名也宋南  
渡後隱居武當日以栽杉為事今五龍宮  
後之杉皆公手植之培植灌溉靡有暇刻

一日忽遇

玄帝化形道相問以栽杉之因慰諭之曰  
神則清矣惜乎無鬚以手頷之亦以為常  
經宿但覺有物如絲縈於胸臆視之鬚已  
長尺餘矣自後建雲窠以奉之甲午三月

一日清旦雲中隱隱見跨鶴之形回視故  
居惟杖履在

隱士田蕞衣武當傳田蕞衣不知名也隱武  
當隱仙巖石室冬夏止一蓑衣時人以蓑  
衣稱之隆冬則真氣如蒸盛夏則溫涼如

玉人有疾厄叩之者摘衣草吹氣與之服  
者即愈錄大丹端平間失公所在今丹室  
爐竈存焉

隱士謝天地武當傳謝天地者不知其姓名

也絕粒不食步履如飛居南巖更衣臺下

石室中石壁萬仞下臨深澗雖猿鶴莫能  
往來公飛行自若人有啓問但應之曰謝

天地餘無他語人以是名之所居之巖人  
亦以是名之後仙去不知所在

孫寂然記曰名元政號寂然子嗣葉茅山清

真觀得上清五雷諸法之妙遍禮福庭時

汗湖龍去江漢罹金兵之厄武當殿宇為  
之一空紹興辛酉首登武當與復五龍開  
闢基緒以符水復舊為民除疾眾皆歸之  
數年之間殿宇悉備高宗詔赴闕庭以待

水稱旨勅度道士十人後還山無疾而逝  
藏其屍於桃源之東

鄧真官名安道孫寂然之弟子也自幼隨師  
開復武當首蒙恩賜盡得其師上清五雷  
諸法之妙駕風鞭霆其應如答遠邇疾患

皆奔趨之繼奏勅住五龍興建正殿覆石  
壁立鏡鑿甚苦默施神用一夕雷雨為破

其石度弟子數人以觀付之潛調龍虎內

鍊甲庚嘉泰中預告徒眾奄卧而逝大風  
拔木移時方散人謂乘風而往劔瘞宮北

遺跡昭然

曹觀妙名侍德峴山人也勿入道居武當嗣  
五龍之派天性穎悟舉止非凡自作一家  
書體飄逸有神仙之態四方多敬之道法

陰陽靡不博究膺觀妙之號領住山之職

遠近皆師事後移領三茅崇禧之任及歸  
晚節清高衆期輕舉一夕夢守山之神語  
曰三茅真君來日降此君宜速迂旦即領  
衆迎至會仙峰久無一人至者日將暮真  
君化爲田夫荷蓑而至衆莫之識今擊物  
以歸抵觀拜於堂下尋欲勞之不得但見  
異香襲人覆滿庭戶悔無及矣後誠徒衆  
曰此間仙凡混居之地自今已往世世不  
受道俗禮拜令武當道友不受俗拜始此  
尋立聚聖殿以奉之嘗謂門弟曰吾因受  
三茅真君禮不免金解端平三年十月不  
旬果罹兵難白骨凝膏略無腥血刃者致  
拜釋劍而去後劍其神蛻塚於桃源  
唐風仙風仙名守澄隨州人幼入武當姿貌  
古怪鶴體松形胡蘆數十常掛杖上往來  
於均房之間壬子重復均州郡守程進令  
開闢武當五龍香火未幾制微道士王禮  
常至退而樂道人之吉凶悔吝莫不預述  
無不驗者常叱辱人被叱者即蒙福慶人  
以風仙稱之或立積雪或卧道路常有虎

豹守衛時貴禮敬之開慶己未不知所在  
汪貞常名思真號寂然子貞常所賜之號也  
家世徽人宋丞相汪伯彥之後生於安慶  
嗣全真教法入武當山至元乙亥領徒衆  
六人開復五龍荆榛塞途黑虎爲之引導  
興建殿宇改觀爲官四方師禮之度徒衆  
百餘人任本宮提點吉凶預知後無疾而  
蛻俗民多夢步紫雲而北去  
魯洞雲名大宥號洞雲子隨州應山人也家  
世官族幼入武當學道遍歷南北至元乙  
亥偕汪貞常開復武當住紫霄數年八十  
餘以道著遠點墨片紙可療疾度徒衆百  
餘人解化之日面若童顏其證道可知矣  
葉雲萊名希真號雲萊子處州括蒼人也辛  
亥年三月初五日巳時生唐天師葉法善  
之族裔生於建寧得清微道法之妙兵遷  
古穰入武當山至元乙酉應詔赴闕止風  
息霓檣雨却疾悉皆稱旨至元丙戌欽受  
聖旨領都提點任武當護持自公而始後  
捧御香還山儵然而逝

武當福地總真集卷下